

PROPOSICIÓN SOBRE A ACTUACIÓN DO CONCELLO PARA GARANTIR O AVANCE NA CONSECUCIÓN DA NOVA ESTACIÓN DEPURADORA DE AUGAS RESIDUAIS NO SOUTO

O **Grupo Municipal do Partido Popular**, ao abeiro do Regulamento Orgánico Municipal, presenta, para a súa inclusión no Pleno, a seguinte **PROPOSICIÓN**:

EXPOSICIÓN DE MOTIVOS

Todos os grupos con representación no Concello de Santiago temos coincidido na importancia e a urxencia de acometer a nova Estación Depuradora de Augas Residuais (EDAR) de Santiago. A cidade leva varios lustros esperando por esta obra vital para a recuperación ambiental do río Sar, para a saúde das augas e das persoas.


Sen a EDAR, ademais, o Concello seguirá a incumprir a normativa europea de vertidos. Iso fai que adquira un carácter de infraestrutura de alcance comarcal e mesmo galega. Sen dúbida esa urxencia e ese carácter levaron a considerar a súa construción como "de interese xeral do Estado", comprometendo a colaboración da Administración do Estado e tamén da galega para resolver unha carencia esencial dun servizo que é propiamente municipal, tal e como determina de forma expresa a lexislación vixente.

Despois de unha época de continuas demoras, con vacilacións e incertezas sobre a súa localización, que levaron a perder a oportunidade de acollerse ao financiamento aos fondos europeos 2007-2013, desde hai uns anos déronse pasos firmes na dirección de levar adiante esta obra cun traballo conxunto entre os gobernos central, autonómico e local.

Deste xeito, elaborouse un estudo multicriterio de alternativas que sinalou como axeitado o lugar do Souto e redactouse un anteproxecto que conta coa aprobación da correspondente avaliación ambiental que foi sometida ao obrigado trámite de información pública. Calquera localización dunha infraestrutura coma esta pode comportar algún tipo de afección, pero todo indica que desde todo punto de vista o Souto é o mellor emprazamento posible no termo municipal, aínda máis tendo en conta a sentenza que anulou o estudo ambiental que se tiña tramitado para a anterior opción fronte á EDAR existente.

A actuación prevista implica a prolongación dun colector interceptor do río Sar ata a nova depuradora que se prevé construír cunha capacidade para 264.000 habitantes, con eliminación de nutrientes por vía biolóxica, tratamento terciario e tratamento de lodos. Uns traballos que tamén implicarán o derribo da actual EDAR e a recuperación ambiental e paisaxística da súa localización actual.

Ata o de agora, a Xunta de Galicia, o Ministerio de Agricultura e Pesca, Alimentación e Medio Ambiente, así como o Concello de Santiago de Compostela teñen o compromiso de executar as obras da nova depuradora no Souto a través dun convenio no que se vai concretar a participación de cada Administración. Con ese fin, as tres administracións teñen celebrado varias reunións e contemplado recursos económicos nos respectivos orzamentos.




Recentemente, a raíz da noticia da admisión a trámite dun recurso contencioso-administrativo contra a localización da EDAR, a postura do Goberno municipal semella ter mudado respecto da construción desta infraestrutura, razón pola que –tendo en conta a urxencia desta instalación, a posibilidade de perder o financiamento preciso para a súa construción e a necesidade de clarificar a postura da Corporación ao respecto- o Grupo Municipal do Partido Popular presenta á consideración do Pleno o seguinte

ACORDO

O Pleno insta ao correspondente órgano do Concello de Santiago a:

1. Que realice as xestións oportunas para garantir a personación da Administración local no procedemento que se poida seguir logo da admisión do recurso contra o proxecto de construción da estación depuradora de augas residuais (EDAR) de Santiago de Compostela, coa finalidade de defender os pasos dados para facer realidade o irrenunciábel interese municipal de dispoñer dun equipamento imprescindible para a protección ambiental do termo municipal e da conca fluvial do río Sar.
2. Que inste ao Ministerio de Agricultura e Pesca, Alimentación e Medio Ambiente e á Xunta de Galicia a impulsar as accións necesarias para seguir avanzando na consecución da EDAR que Santiago necesita e ten comprometida como obra de interese xeral do Estado.
3. Que inste ao Ministerio de Agricultura e Pesca, Alimentación e Medio Ambiente a que na redacción do proxecto definitivo mellore a integración ambiental da instalación e garanta as medidas para minimizar de xeito adicional o impacto na contorna.
4. Que inste ao referido Ministerio a poñerse a disposición dos concellos de Ames e de Santiago para facilitarlle a información que se considere necesaria sobre os detalles deste proxecto da EDAR, a súa adecuación legal e as vantaxes que comporta para a recuperación da calidade das augas do río Sar.

Santiago de Compostela, a 1 de decembro de 2017



Agustín Hernández
Portavoz do Grupo Municipal Popular

- Sr. Alcalde do Concello de Santiago de Compostela